

2. september.

337

Nr. 162.

Staðfesting forsetans á skipulagsskrá fyrir Minningarsjóð Helgu Sigurðardóttur, skólastjóra Húsmæðrakennaraskóla Íslands, útgefin á venjulegan hátt að mandatum af dómsmálaráðherra 12. september 1963.

Skipulagsskráin er þannig:

SKIPULAGSSKRÁ

fyrir Minningarsjóð Helgu Sigurðardóttur skólastjóra Húsmæðrakennaraskóla Íslands.

Helga Sigurðardóttir, f. 17. ágúst 1904, d. 26. ágúst 1962, hafði forgöngu um stofnun Húsmæðrakennaraskóla Íslands og var skólastjóri hans frá því hann tók til starfa haustið 1942 til 1. september 1961, að hún sagði starfinu lausu vegna heilsubrests. Stjórn Nemendasambands Húsmæðrakennaraskóla Íslands gekkst fyrir stofnun þessa minningarsjóðs með sölu minningarspjalda við andlát frk. Helgu Sigurðardóttur skólastjóra í þakklætis- og virðingarskyni fyrir brautryðjandastarf hennar.

1. gr.

Sjóðurinn heitir Minningarsjóður Helgu Sigurðardóttur, skólastjóra Húsmæðrakennaraskóla Íslands. Heimili hans og varnarþing er í Reykjavík. Sjóðurinn var hinn 1. nóvember 1962 kr. 20 056.50.

2. gr.

Tilgangur sjóðsins er að styrkja efnilega nemendur í Húsmæðrakennaraskóla Íslands, þá sem þurfa á fjárhagsaðstoð að halda.

3. gr.

Sjóðurinn er sjálfseignarstofnun í vörzlu þriggja manna sjóðstjórnar. Hana skipa skólastjóri Húsmæðrakennaraskóla Íslands, sem er formaður, formaður Nemendasambands Húsmæðrakennaraskóla Íslands og einhver af nánustu ættingjum Helgu Sigurðardóttur, tilnefndur af þeim.

Fyrstu sjóðstjórnina skipa frk. Vigdís Jónsdóttir, skólastjóri H.K.Í., formaður, frú Auður Jónasdóttir, húsmæðrakennari, formaður N.S.H.K.Í., og frú Ragna Sigurðardóttir, Þórustöðum, systir hinnar látnu.

4. gr.

Sjóðstjórnin skal sjá um ávöxtun höfuðstóls sjóðsins í tryggum verðbréfum, er ábyrgð ríkissjóðs fylgir, eða í sparisjóðsbókum.

Reikningsár sjóðsins er almanaksárið og skal sjóðstjóri árlega birta ársreikninginn, endurskoðaðan af tveimur endurskoðendum, tilnefndum af stjórn N.S.H.K.Í.,

B 43

í B-deild Stjórnartíðinda og í skýrslum Húsmæðrakennaraskólans, þegar þær eru gefnar út.

5. gr.

Höfuðstól sjóðsins má aldrei skerða. Helming vaxta skal leggja við höfuðstólinn, þangað til sjóðurinn er orðinn kr. 50 000.00, þá $\frac{1}{3}$ vaxta, þangað til sjóðurinn nemur kr. 75 000.00, úr því $\frac{1}{4}$ vaxta, þangað til höfuðstóllinn er orðinn kr. 100 000.00. Eftir það skal leggja $\frac{1}{10}$ vaxta við höfuðstólinn, og má þá úthlutunarnefnd færa út starfssvið sjóðsins, ef ástæða þykir til, en jafnan skal sjóðurinn þó fyrst og fremst vera styrktarsjóður. Komi það fyrir eitthvert ár, að enginn eða ekki fullur styrkur sé veittur úr sjóðnum, ákveður sjóðstjórn, hvort hið óráðstafaða fé skuli lagt við höfuðstól eða því bætt við úthlutun næsta árs eða næstu ára. Þeim hluta af vöxtum sjóðsins, er ekki á að leggja við höfuðstól, skal varið til að styrkja nemendur, skv. 2. gr.

6. gr.

Styrkinn skal auglýsa í skólanum í janúar ár hvert. Úthlutun úr sjóðnum skal fara fram fyrir marzlok ár hvert. Sjóðstjórn sér um úthlutun styrkja í samráði við kennara skólans. Nú sækir enginn nemenda um styrk, og hefur þá skólastjóri heimild til í samráði við sjóðstjórn og fasta kennara skólans að úthluta þeim nemenda eða nemendum, er hann telur helzt þurfa styrksins við.

7. gr.

Sjóðinn má efla með minningargjöfum og með öðrum ráðum, er sjóðstjórn telur heppileg. Þó má aldrei krefja nemendur skólans um framlag í sjóðinn.

8. gr.

Starfi Húsmæðrakennaraskóli Íslands ekki um stundarsakir, skal ávaxta höfuðstól sjóðsins samkvæmt 4. gr., þangað til skólinn tekur aftur til starfa, og skal sjóðstjórnin annast þá ávöxtun.

Verði Húsmæðrakennaraskóli Íslands lagður niður, getur stjórn sjóðsins ákveðið, hvernig sjóðnum skuli varið.

Ráðstöfun sjóðsins skal þó jafnan við það miðuð, að hann stuðli að því að efla húsmæðrafræðsluna í landinu.

9. gr.

Stjórn sjóðsins getur breytt skipulagsskrá þessari, enda sé hún einhuga um breytinguna.

10. gr.

Leita skal staðfestingar forseta Íslands á skipulagsskrá þessari.